

**ZOHANE' GIZINE' LUHUVO
NITE' NABA 1**
**Zohane' Gizine' Luhuvo Nite'
Gomu' Gataa' Gamazi**

Mono' godolo gosohoku' nene evene' gulive'ine Zohane' ve li milave hamo pamo' minani' nemu' ne ma gataa' nounge. A'mine ve nene ma nene mono' noso holo-ngedaa' ive Zohane' ido' ma nene Izesu' gamazi've lamine' gizive Maleko' eze gulive ma nene Zohane' ido' ma nene Zuda velo' medelo mino O'moso inite' lehize-daa' ive naba gulive Anasi' zuhouti' minive gulive Zohane'. Nemu' nene neu' do gopo' napa ogo gelamozo. A'mine ve nete Zohane' luhuvo nite' nene ma gizamave.

Luhuvo nite' sitohamo gizive nene evene' nete luhuvo nite' Zohane' gizine' ve lani'za a'mine luhuvo nite' gizive nene gulive've gizamine' neine'za gana' aka'milati' Zebedai'o' gipele Zohane' nene gizine' ve lani'. A'mine Zohane' nene Zuda ve nGalilaia misuboukoti' minine'. Eze bisinisi've nene alaha' belo maketilo' molaa' ine'. Ido' Izesu' aza izipahala zuho doka' doka' ine' nene gana' api' ogo ei' Zohane'ni nene dani'. Ido' Izesu' hilinguti' otavo O'moso'mo Okulumukuko ele'mizo do dizo vavosa Zohane' nene gamene ha'na Zelusalemi numuno ebeku' O'moso'mi gono do minine'. Ti' ogo minidoti' nene ebe' ma gulive Eheso nela ongo monelesa vine'. Loma vete Asia misubo ve laa' angu' ve. Asia misubou' Izesu' zuho minani' neti ve naba'ine lolo' ine'.

Gamene ma Eheso ebekuko ongo nomonosa nene Izesu' gamazi've lamine' Zohane' gizine' ve laa' noune' nesi Zohane' luhuvo nite' sitohamo ve laa' noune' nesi nene gizine'. Ido' alinge' soto' ilinekumu' gamazi Leveleseni ve laa' noune' nesi nene gizine'. Ne'mine ogo Eheso ebeta ongo mono mino mo vani gehepeve molani'. Ti' ogo hiline'. Izesu' izipahala zuhouti' nene ei' hamo' alinge' hiline'.

Zohane' aza luhuvo nite' gana' gizine' nene ne aleve ma nene nohulo-ngiduve lo lamiha evene' nete Asia misubou' Izesu' zuho minani' nene gizo hulo-ngidive li gilani' nene ele'vole' ine'. A'mine gameneu' nene Eheso ebeku' soza mono' gamazi li-ngimaa' ave ma minadite ne'mine laa' ani': Inite' muki' do gelaa' une', no lanite' gelaa' une', ningune' inite' ido' inite' pata' oko'inesi inite' muki' nene mo inite' golosovo' ve lisa O'mosovo' hamo' nene lamine' gehepeve ve lani'. Ido' inite' pata' nene goloso minikevo O'mosovo' lamine' ve li gilani' nemu' nene gamazi ne'minisasi ma lani': Evene' okode nene goloso neivo lamine' minive O'moso nene evene' oko'no ngelo do otuhilihe. Ne'mine mo amoloseive li laa' ani'. Nemu' nene evenelite O'moso'mo evene' oko'no do otuho evene' gihile lolo' ine' ve li lani' nene soza ve li laa' ani'. Ne'mine li evene' ti' li li-ngimaa' ani': O'moso ne'mo sikalahu' ma gulive Kilisito'ni nene Izesu' lulou' minevo' dovo' ilive lo imiseline' ve li li-ngimaa' ani'. Ido' ti' li lani': Mono' noso holo-ngedaa' ive Zohane' ne'mo Izesu'ni mono' noso nohulo-divo a'mine sikalahu' gulive Kilisito' nene gana' ei' Izesuda ani' ve li lani'. Ido' hulo-do vine' nene Izesu'ni

lohoto' zalo' olihe bililisa navo hulo-do vine' ve li lani'. Ido' leli' suno' gamazi gili gililizani' nene vodinehaza nene inite' pata' goloso mininekisi nene bizo mininguti' apasi-di di lamine' i-dilisave li lani'. A'mine soza saza mono' laa' ave linge ma nete laza a'mine suno' gamazi mene lo gelelone' ne'mo vodehaza nene do u' izeleseive. Mino molo olone' ne'mo nadilivoba li li-ngimi ngimi' iga' ani' ve. Asi've okode've nene goloso neine' nenako inite' goloso nevo'mine ma oso' ne'mo goloso amive li lani'. A'mine alevete igi mili igi minani' nene gihile nomive lo Zohane' Izesu' zuho minani' nene luhuvo nite' gana' gizo hulo-ngidine'. A'mine luvoni' gamazi ne'mine lave nene gili ngimamilo lo lo-ngimine'. Ido' Izesu' nene leli' haza okode gehepeve ne'mine ani' ve lo lo-ngimine'. Ido' Izesu'ni gele emeso' nene ei' O'moso nesi leliku' minevo' dovo' ogo mineleseive lo nesi lo-ngimine'. Ido' Izesu'nimu' gele ele'vole' olone' nene O'moso'mi izipahala nene none. Ido' izipahala none' nene ei' ve lisihe' minine' ne'mino lazasi a'mine'mino minelone. Goloso inite' nene ihe' geli geli ogo do do vo minamolone. Evene' ma geli geli ogo goloso nite' do do vo mineline' nene O'moso'mi izipahala minamoloseive. Ido' ma nene ti' lo line': O'moso'mo lulo nolimine' ne'mino a'mine'mine ogo lute ezesi emo laza lute ge neme ne geme lo minelone. Me initekumukisi ido' inite' mamukisi nevo losa gizo huline'.

Zohane' luhuvo nite' naba 2 gizingu' nene ei' asi've gulive've nene mono' gizebo ve ve lo gizo O'moso'mo vene' ma do kegeso molo-dine' nene hulo-dine'. A'mine vene' nene zahinemu' lihe

ne'mi monovo nene gelamune. Evene' mukilite gilani' nene gepe' gamazi ve li gilani'. Ti' igi gilisa nene Izesu' zuho Asia misubou' ma minani' mulise hamo' nemu' line' ve lani'. A'mine luhuvo niteku' nene gomu' ma gizingu' gamazi gosoho' nasaha' laa' avemu' gizine' ma'mino gohi gizingu' nene gohi line'. Ti' ogo a'mine ve soza gamazi li-ngimaa' ave nene Izesu' zuholite numu'nida ngele'mizi di vi mese' aseka li-ngidamilizave lo lo-ngimine'.

Zohane' luhuvo nite' naba 3 nene evene' ma gulive Gaio'ni gizo hulo-dine'. A'mine Gaio'nimu' nene ma gelamune' ve. Zohane' nene Gaio'ni ti' lo lo-imine': Izesu' zuho Gaio' minine' muliseuti' nete evene' mone mone igi O'moso'mi gono nidani' aleve nene di lamine' i-ngidilizave lo lo-imine'. Ido' mono' gizebo ve ma gulive Diotelehe'nimu' nesi ti' lo line'. Aza nene O'moso'mi gono dani' aleve nene do o've lo-ngedelesa oga' ingumukisi ido' ve ma Demetelio'nimukisi line'. Aza evene' lamine' minine'. Demetelio' nene mone mone ogo O'moso'mi gono dani' ve lo gele ele'vole' o none. Aza Zohane' nene Gaio' zuholite Izesu' zuho minani' nete Demetelio'ni mese' aseka lii di lamine' i-dilizave lo gizine' ve. Dioteleheki Demetelioki nene Asia misuboukoti' ve nizasive lo gele noba ingine nene ne'mine mana'mine asive lavo ma gelamune.

Zohane' luhuvo nite' nene gatosa gele guno olosane.

Minevo' Minevo' Minaa' Do Soto' Ive'mi Gamazi

1 O'moso'mo olihe api' ogo inite' mata' do soto' amivosa a'mine gamenelo' aka'mine ha minivemu' nene luhuvo nite' mene gizo nolo-lingimuze. Ningilo. Ee, a'mine gilune' ido' vetedunu' ningo ninge'mo vo minune' ido' adedunu' do gilune' nemu' nolo-lingimuve. Ado' minevo' minevo' minaali'mi meleho ne'mi monovo've laa' ivemu' nene nolo-lingimuve.

2 A'mine ve nene minevo' minevo' ogo minaa' do soto' ine' nene ningune' ve. Ningune' nenako a'minemu' lo-lengemaa' noune. A'mine minevo' minevo' ogo minaa' nene metehida minidoti' soto' o-ledavo ningune' nemu' lo soto' o-lengemaa' noune.

3 Ee, linginesi lazasi a'mido' lute do hamo' ogo bizo minelone lo inite' ningune' ido' gilune' nene lengikisi lo-lengemaa' noune. Ido' laza nene lute do hamo' ogo bizo minaa' noune' nene Meteho O'mososi ido' gipele Izesu' Kilisitokisi bizo minaa' noune.

4 Ido' linginesi ne'mine ogo lute do hamo' ogo bizo mino lolize izo minelone lo nene gamazi nogize-lingimuve.

O'moso'mi Labanaku' Minevo' Dovo' Ogo Mi-naakumu' Gazine' Gamazi

5 Ido' ezelati' gilune' gamazi nene ne'mino neive: Eita inite' goloso liti'musou' inite' hamokisi mo keke' nomive. Nomivo O'moso ezela neve inite' lamine' labanakovo' neive.

6 Nemu' nene liti'muso monovo golosou' nomonosasi laza ezesi do hamo' ogo bizo none lo lolone' nene sozasi lokunivo ogo molo olone' nene inite' gihile nomoloseive.

⁷ Ne neiha aza nene labanaku' neine' ne'mino lazasi a'mine'mine ogo labanaku' minevo alevo' olone' nene lute do hamo' ogo lamine' bizo minelesune. Ido' ne'mine okunivo gipele Izesu' vanise ne'mo nene goloso nitete mudise gilite lede'mo vo neivo laminovo' minelesune.

⁸ Ido' lihime lelita nomive lolone' nene soza lo leli' lute nene golo izelesune. Ne'mine okunivo gamazi gihile nene lelita minamoloseive.

⁹ Ne neiha laza lihimete lo soto' olone' nene aza a'mine lihimete nene hulo-ledo goloso nite' lelita neine' vai' nene gilite-ledeleseive. Ee, aza nene ve lisihe' mino gote izesa'mine' nenako nemu' lihimete lo soto' okunivo lihimete hulo-ledeleseive.

¹⁰ Ne neiha goloso nite' daa' nave lo lo-lemaa' neine' nenako laza goloso nite' ma damaa' noune lo lolone' nene O'mosomu' sozalo' ve ve lo lodune' geleseive. Ido' ne'mine olone' nene eze gamazi leze luteu' minamoloseive.

2

O'moso'mo Lihime Lemelesa Neivo Hize Ele' O-ledaa' Ive Izesu' Neive Lo Gizine' Gamazi

¹ Izipaha'ne zuho mate, goloso nite' ma dikelizave losa luhuvo nite' mene nogize lingimuve. Ido' mali'mo lihime nite' ma daline' nene Metehida a'mine lihime'vemu' goni' ogavo leze hize ele' o-ledelive ve lisihe' Izesu' Kilisito' nene a'mida neive. Aza nene a'mine lihime ma dalive nene hize ele' o-deleseive.

² Asi've Izesu' gono do lihimete apase-lidine' ma ve. Ido' leli' lihimetevo' nomive. Evene' muki' misubou' misubou' mini'mi monaveti lihime'ine nesi apase-ngidine' ve.

3 Ido' eze nene ningo gele none lo gelaa' nounge' nene lamine' nehe. Nado gelesune. Leli' monovote do ningosa gelesune. Eze gamazi lo huko-lidine' nene gele do minaa' noolone' nene eze ningo gele none lo gelaa' nounge' nene lamine' gelaa' nounge lo gelesune.

4 Ido' evene' lingelite eze ningo gele none li gamazi've gili disa'mani' nene ingine sozalo' ve minikevo gamazi gihile engita nomive.

5-6 Ido' evene' linge ma O'moso'mi gamazi gili di minani' nete ingine lu'ine imani' nene apa nite' nomive. Laminetokovo' imi gili' li imaa' nave. Ido' ingine O'mosola gi'mize none laa' ave nene Izesu' ogo molo minidi'mine igi inginesi a'mine'mine igi mili minilizani' o neive. Laza ne'mino ogo molo ogo mino ma ne'mo ezela gi'mize none lune' nene gamazi gihile ve lo gelesune.

*Lou' Gamazi Liteheli'mo Gosoho' Gidini
Gilingumu' Gizine' Gamazi*

7 Lu'ne lengeme nouvoni' mate, lou' gamazi gosoho' ma lo soto' ogo gize lengemamuve. Litehe lou' ado' gamene gozopo' aka'milati' gili minani' mamu' nogize-lingimuve. A'mine lou' gamazi litehe nene nado neve. Nene mono' gamazi li-lingimikevo gilaa' nani' nene neive.

8 Ne neiha mene luhuvo niteku' nogizuvo a'mine lou' nene gosoho' neine' gelave. Ee, mo lamineto' gosoho' neive. Izesu' aza a'mine lou' nene do gosoho' ogavo linginela gono gosoho' nodavo liti'muso izo minine' nene vovo' vovo' neivo labana' gihile nene mo api' ogo noilive.

9 Ne neiha evene' linge ma evene' mamu' mulu'ningu' goloso ogavo lukehe ngibili minisa laza labanaku' none li laa' nave nene ingine olihe labanaku' ami liti'musou' ha nizave.

10 Nizani'za evene' linge ma ingine evene' muki' lu'ine ngimi nasahili' i-ngidaa' ave nene lamine' labanaku' nizave. Ingingine evene' ma ngele'mizi gopo amilisave.

11 Ido' ingine evene' mamu' mulu'ningu' goloso ogavo lukehe ngibilaa' nave nene liti'musou' ha nizave. A'mine ve nete liti'musoukovo' moni liti'musoli'mo ve'ine likavo vilizani' aka nene ningi gilamave.

12 Izipaha'ne zuho mate, Izesu'nimu' ve lo O'moso'mo lihimetine hulo-lengede neive. Nemu' luhuvo nite' mene nogize-lingiduve.

13 Ido' me'ninge lingine O'moso'mo olihe api' ogo inite' mata' do soto' amivosa a'mine gamenelo' aka'mila ha minive nene ningi gili nizave.

Nemu' luhuvo nite' mene nogize-lingiduve.

Ido' ve goso've lingine goloso meleho Satani mo ivile' igi nizave.

Nemu' luhuvo nite' mene nogize-lingiduve.

14 Izipekizo, lingine Metehine ningi gili nizave.

Nemu' luhuvo nite' mene gize-lingiduvoni' ve.

Ido' me'ninge lingine O'moso'mo olihe api' ogo inite' mata' do soto' amivosa a'mine gamenelo' aka'mine ha minive nene ningi gili nizave.

Nemu' luhuvo nite' mene gize-lingiduvoni' ve.

Ido' ve goso've lingine amuzo mili minavo O'moso'mi gamazi nene lutingu' neivo

goloso meleho Satani mo ivile' igi nizave.
Nemu' luhuvo nite' mene gize-lingiduvoni' ve.

*Laza Misubouko Niteto' Lute Molam-
oloningumu' Gizine' Gamazi*

¹⁵ O'moso gelekele' o-damo misubouko minevo' dovo' oga' sunolo' nehe ido' me misubou' minine' inite' gulosolo' nehe nene lutine milamilo. Evene' ma ingine lu'ine a'mido' milani' nete lu'ine nene Meteho O'moso imisa'mave.

¹⁶ Misubou' veti monovo danava muki' nene goloso nitekumu' lumo helaa' ido' inite' mata' ninge lamine' tamine' ogo mumuzo' oga' nehe ido' evene' ve'nido' heneheni nganeni do soto' soto' ogo gonolise gonolise ogo okode lute do dize dize' oga' nehe ne'mine monovo nesi nene Metehidati' nomive. Misuboukotikovo' neive.

¹⁷ Ido' misubou' neve a'mingu' lumo helaa' ine' inite' mata' nesi nene osu' lo'mo novive. Noviha ingine O'moso'mi gamazi gili di minaa' nave nene vi osu' lami minivi' minivi' igivo' minilisave.

*Kilisito'ni Lovo O Emaa' Ive Neine' Mamu'
Gizine' Gamazi*

¹⁸ Izipaha'ne zuho mate, gamene nene mo li'nibe ogave. Nemu' Kilisito'ni lovo o emaa' ive mo soto' oloseive li li nizani' nene mo giligeve. Ido' gilado' nene lovo i imaa' ave muki' nene mo soto' ikeve. Nemu' nene gamene mo li'nibe ogave lo gele none.

¹⁹ A'mine ve nene lezesi maka' minuninguti' leze huli-lidi vani'za leze aleve gihile lili' igi minamave. Leze aleve gihile lili' igi minadini

leze huli-lidi vamavo maka' minunidine. Ido' ingine huli-lidi vani' nemu' ingine muki' leli' zuho minamani' nene soto' ogavo gele none.

²⁰ Emeni dameni've lamine' atoli'minesi minive ne'mo Sikalahu've lehize-lingidivo mini lingine muki' gamazi gihile nene mo gili nizave.

²¹ Luhuvo nite' mene gizuvoni' nene lingine gamazi gihile lamine' nene gilamave lo gizamuve. Gamazi gihile lamine' nene mo gili mini a'mine gamazi gihile laminekuti' nene soza gamazi ma soto' osa'mine' nesi nene gili nizave lo gizuvoni' ve.

²² Ido' sozalo' ve ve lo ne zamotinemu' lolone. Inginge Izesu'nimu' ataize li aza O'moso'mo do lu' izelive lo imiselelesa live minamive li laa' nave nene ingine sozalo' ve ve lolone. Me ve nete Melehingi gipelengi ataize li-ngidisa Kilisito'ni lovo i imaa' ave nizave.

²³ Inginge gipelemu' ataize li-daa' nave nete Melehosi maka' bizi minamaa' nave. Ido' ingine gipele gili imaa' nave nete Melehosi maka' bizi minaa' nave.

²⁴ Lingine gozopo' gamene aka'mila gana' gilani' gamazi nene gili di minilo. A'mine gana' gilani' gamazi nene gili di minilizani' nene Melehingi Gipelengi inginela gi'mize lamine' ilisave.

²⁵ Ido' Izesu' aza inite' ma lehize-ledelove lo lo huko line' nene minevo' minevo' ogo minaa' lemeni dameni nene lehize-ledelove lo molo-lede neive.

²⁶ Me gamaziu' nene lengi' lengele'mize gopo ilisa gili minaveti monovo lo soto' ogo gize lingimuvoni'za

²⁷ lingine neve Kilisito' lehize-lingidine'

Sikalahu've nene ha di mini'mi vi nizave. Di mini'mi vi nizanako evene' laza inite' matakumu' apize lengemelonido' nomive. A'mine Sikalahu've lehize-lingidine' ne'mo inite' matakumu' apize lengemaa' neive. Ido' gamazi lo-lengemaa' neine' nene sozasi nomive. Laminetokovo' lo-lengemaa' neine' nenako lido' nene gili di Kilisitoda gi'mizi minilo.

²⁸ Ee, izipaha'ne zuho mate, Kilisito' ogo heteleline' gamene soto' ilingu' nene laza eze velelo' mino lovozo helepele' ogo lehelele iza-mivo minelone li ezela gi'mizi minilo.

²⁹ O'moso aza nene ve lisihe' lamine' neive li lingine gili nizave. Gili nizanako evene' ingine monovo lisihe' lamine' igi mili minaa' navemu' nene O'mosolati' soto' ani' ve li gililisave.

3

Idise O'moso'mi Izipahala None Lo Gizine' Gamazi

¹ Vekizo, Meteho lulo atoli'mine ogo leme neine' nene gili nizahe. Ee, lulo atoli'mine ogo limidoti' nene izipaha'ne zuho ve lo lo-ledaa' neive. Ido' lamine' izipahala zuho none. None'za me misubou' ve O'moso gelekele' i-damani' ingine nene O'moso ningi gilamani' nenako lezesi a'mine'mine igi ningi gilamaa' nave.

² Ido' lu'ne lengeme nouvoni' aleve mate, laza idi'nise nene O'moso'mi izipahala zuho ne none. Ido' mino nani lemeni damenilo' soto' olone' nehe ne'mi monovo nene olihe ma soto' o lamine' amine'za laza mo ti' lo gele none: Guvetesi ve soto' iline' gamenelo' nene ei' emeni dameni've

ningo lazasi ei' emeni dameni ne'mine gidinisi minelesune losa gele none.

³ Ido' ogavo eze ningo emeni dameni ne'mine gidinisi minelone li ezemu' gili ele'vole' igi minaa' nave muki' ingine nene ei' lulo lamine' minine' ne'mino leze lute nesi lamine' minelive li engi' lu'ine di lamine' igi minaa' nave.

⁴ Goloso nite' daa' ne'mo O'moso'mo lou' gamazi line' nene avuto' oga' neine' nenako ingine goloso nite' daa' niilizani' nene O'moso'mo lou' gamazi line' nene avuto' ikeve.

⁵ Avuto' ikeni'za Izesu' aza goloso nite' do hulolosa soto' ine' nesi ido' ezela goloso nite' ma minamine' nesi nene lingine gili nizave.

⁶ Nemu' nene ezela gi'mizi minaa' nave ingine goloso nite' di minisa'mave. Goloso nite' daa' nave nete nene eze ningi gilisa'mave.

⁷ Izipaha'ne zuho mate, ingine monovo lisihe' lamine' igi mili i minaa' nave nene Izesu' aza ve lisihe' lamine' minine' ne'mini evene' lisihe' lamine' nizave. Nemu' malite ato' gamazi li lengele'mize gopo ikelizave.

⁸ Ido' malite goloso nite' di minilizani' nene ingine Satani'mi zuho minilisave. Satani aza goloso nite' gozopo' aka'milati' do'mo ogo minaa' neive. Ido' goloso nite' do'mo ogo minine' nenako O'moso'mi gipele aza Satani'mi gono nene bele helo ize huko-delesa soto' ine' ma neive.

⁹ O'mosolati' soto' igi izipahala lili' igi nizave ingine goloso nite' mo di minisa'mave. Ee, O'mosolati' emeni dameni've engita mine molo neivo ingine ezelati' soto' igi ei' izipahala lili' i nizanako goloso nite' ngeli di minamilisave.

10 O'moso'mi izipahala zuho ido' Satani'mi izipahala zuho engi' monovo danava ti' lo do kegeso ningelesune: Evene' ma ingine hehe li lamine' minamilizani' nene ingine O'mosolati' soto' igi minamave lo ningelesune. Ido' a'mine'mine ogo evene' ma ingine evene' muki' lu'ine ngimi nasahili' i-ngidamilizani' nene ingine O'mosolati' soto' igi minamave lo ningelesune.

Lute Ne Geme Ge Neme Lo Minelone Lo Gizine' Gamazi

11 Nemu' nene mono' gamazi api' ogo gilunidoti' gamazi ti' lo gele'mo gele'mo ogo minune: Laza lute ne geme ge neme lo bizo minelone.

12 Gozopo' vomila minive Kaini' aza ine' ne'mine amolone. Aza nene ve goloso Satani'mi gipele lolo' ogo akunoloine bele hiline'. Ido' bele hiline' monovo nene nanitekumu' bele hilive. Ei' Kaini' ogo molo minine' monovo've nene goloso o vivo ido' nakunolo'mo ogo molo minine' monovo've nene lisihe' lamine' minine' nenako nemu' bele hiline' ve.

13 Leze zuho mate, me misubou' ve ado' O'moso gelekele' i-damaa' ave nete lengikumu' mulu'ningu' goloso ogavo lukehe lingibilaa' nangumu' nene lingine gosoho' suno ma ve li gili upuho' igi gatine muki' gilamilo.

14 Laza lute evene' muki' ngemaa' nounge' nenako lelikumu' ti' lo gelaa' nounge: Hele noninguti' tine' molo ogo ele'vole' ogo minevo' minevo' ogo mineloningu' vo holokune' ma neive. Evene' malite evene' ma lu'ine ngimami minaa' ave ingine nene lu'ine hele vine' nizave.

15 Malite evene' mamu' mulu'ningu' goloso ogavo lukehe ngibili minaa' nave ingine nene evene' ngibili hilaa' ave nizani' gelaa' neive. Ido' evene' ngibili hilaa' avemu' lingine mo gili nizave. Ingingine minevo' minevo' ngemeni damenisi minamave.

16 Izesu' aza lelikumu' ve lo minevo' alevo've hulo lute ngemali'mi monovo lelebizavo ningo gele none. Nemu' laza a'mine'mine ogo evenekumu' nene minevo' alevote hulolonido' o neive.

17 Ne neiha evene' ma me misubo'mi heneni di minave ingine evene' ma inite'ine nomine' minave ma ningi mulumo'ine gili inite' ma ngimami minilizani' nene ingine mo keke' lu'ine O'moso imisa'mave.

18 Izipaha'ne zuho mate, laza lute evene' nge-maa' nounge lo ma haza gamazi've vetedunukovo' lalone. Lute ngemaa' nounge lo ma ne'mi gihile've do soto' iline' gono nene dalone.

*O'moso'mi Velelo' Gele Olobo' Ogosa
Mineloningumu' Gizine' Gamazi*

19 Ne'mine ogo minaa' olonidoti' nene laza gamazi gihile lamineli'mi zuhouti' none' nene ningo gelelesune. Ne'mine ogo O'moso'mi velelo' lute do hongu lo minelesune.

20 Ido' goloso nite' daa' unive ve lo lutedunu' gelo lovozo helo ma ti' lo gelelesune: O'moso nene lute ivile' ogo mino inite' mata' muki' nene gele ngolo' lo gelaa' neive.

21 Lu'ne lengeme nouvoni' mate, goloso nite' daa' unive ve lo lutedunu' gelo lovozo helamo ma

O'moso'mi velelo' nene gele olobo' ogo minelesune.

²² Ne'mine ogo laza nene lo huko line' gamazi nene gele do mino nemu' eze mulunou' lamine' gelaa' neine' inite' ogo molo minaa' nounako ezela inite' nanitekumu' lube nene haza lemavo daa' noune.

²³ Ido' a'mine lo huko line' gamazi nene ti' lo neive: Izesu'nimu' nene aza O'moso'mi gipele mino O'moso'mo do lu' izelive lo imiselelesa live nene neive lo laza gele ele'vole' ogo lute ge neme ne geme lo mineloningumu' lo-limido' e'meto olosune.

²⁴ Ido' lo-huko line' gamazi nene gele do noolonive laza O'mososi bizo lamine' maka' minekunivo O'moso aza luteu' minevo dovo' ogo minaa' neive. Ido' eze Sikalahu' lehize-lidine' ne'mo lo-lemavo O'moso aza luteu' minevo' dovo' neive lo gelaa' noune.

4

O'mosolati' Gamazi Nehe Atokuti' Gamazi Nehe Lo Izeka Hizo Geleloningumu' Gizine' Gamazi

¹ Lu'ne lengeme nouvoni' mate, O'moso'mi gamazi lo soto' oga' unive polohete none li sozasi laa' ave muki' soto' igi misubou' misubou' nimonanako nemu' engikuti' ve ma lengita igi soza gamazi li-lingimikevo gili ngimikelizave. Nemu' nene linginela igi Sikalahuli'mo lele'mize akalo' o-lede neive li mono' li-lingimaa' ave muki' gopo gili-ngimaa' nani' monovotine nene hulilo. Gopo gili ngimami gamazi muki' nene O'mosolati' nehe atokuti' nehe li gili ningilo.

² O'moso'mi Sikalahu' ne'mo ngele'mize akalo' o-ngedaa' ivemu' nene ti' li ningilisave: Ve ma ingine Izesu' Kilisito' aza evene' okode ne'mine lolo' ogo soto' ine' ve li li soto' milalizave nene ingine O'mosolati' nizave li ningi gililisave.

³ Ido' ve ma Izesu'nimu' aza evene' okode ne'mine do otuho soto' ine' neive li lamilizani' nene O'mosolati' nizamave. Ingingine Kilisito'ni lovo o emaa' ive'mi gamazi laa' ave nizave. A'mine Kilisito'ni lovo o emaa' ive misubouko soto' oloseive li likevo gili nizave. Ido' idi'nise mo soto' ogo omo neive.

⁴ Izipaha'ne zuho mate, lingine O'mosolati' soto' igi O'moso'mi gamazi lo soto' oga' unive polohete none li sozasi laa' ave nene ngivile' igi nizani' ma neive. Lengi' lutingu' minaa' neive ne'mo me misubou' ve ado' O'moso gelekele' i-damaveti lu'ningu' minive nene ivile' o neive. Nemu' lingine a'mine Kilisito'ni lovo i imaa' ave nene ngivile' i nizave.

⁵ Ingingine misubou' ve O'moso gelekele' i-damaveti ngemeni damenisi minaa' nanako a'mine ngemeni damenilo' vo milise' iline' gamazivo' laa' nave. Likevo misubou' ve ingine lani' gamazi gili lanite' gilaa' nave.

⁶ Laza nene O'mosolati' soto' une' nenako ingine O'moso ningi gilaa' ave nene leze gamazite gili daa' nave. Ido' O'mosolati' soto' amave nete leze gamazite gili hulaa' nave. Ne'mine iga' nanako nemu' O'moso'mi Sikalahu' ne'mo do soto' ine' gamazi gihile lamine' nesi ido' gopo gamazi ado' O'moso'mi Sikalahuli'mo do soto' amine' gamazi nesi nene do kegeso ningo gelaa' noune.

*O'moso'mi Monovo Nene Lulo Lemaa' Neive Lo
Gizine' Gamazi*

⁷ Lu'ne lengeme nouvoni' mate, lute ngemaa' nene O'mosolati' neine' nenako nemu' laza lute ne geme ge neme lo minuke'zo. Ingene evene' lu'ine ngimi nasahili' i-ngidi minilizave nene O'mosolati' soto' adite ilisave. Ingene O'mosomu' mo ningi gili nizave ve.

⁸ O'moso aza lute ngemaa' monovo'mi meleho neine' nenako nemu' evene' ma ingene lu'ine evene' ngimami minaa' nave nete O'mosomu' ningi gilisa'mave.

⁹ O'moso'mo gipele hamo' leli' do lu' izo minevo' minevo' lemeni dameni do soto' o-ledelive me misubouko imiselavo lemo ani'. Nemu' nene O'moso'mo lulo limine' nene soto' ogavo ningekune.

¹⁰ Lute ngemali'mi monovo ti' ogo neive: Laza lute O'moso emamunivosa asi've gomu' lulo lemo lelito' medelo mino oko'no hulo helo lihimete apase-ledelive lo gipeleine imiseline' ve.

¹¹ Lu'ne lengeme nouvoni' mate, O'moso'mo lulo atoli'mine ogo lemaze. Nemu' laza a'mine'mine ogo lute ne geme ge neme lo minelonido' o neive.

¹² Evene' hamolitesi O'moso mo ningamune. Lute ne geme ge neme lo minelone' nene O'moso'mo lezesi bizo luteu' neivo lute imune' nene apa nite' amivo laminetokovo' lute eme gili' lo minelesune.

¹³ Ido' O'mosola bizo none' ido' O'moso'mo luteu' minevo' dovo' ogo neine' nene ningo gele none. Ido' naniteli'mo ningo gele none. Eze Sikalahu've leli' limidi'mo nene ningo gele none.

¹⁴ Meteho aza numudo' namado' ve do lu' ize-live lo gipeleine imiselavo lemo ani' nene la'lisete vetedunu' ningune' nenako ne'mi gamazi lo soto' oga' noune.

¹⁵ Ido' evene' malite Izesu' aza lamine' mo O'moso'mi gipele neive li li soto' ave nene O'moso'mo engi' lu'ningu' minevo' dovo' ogo neivo ingine O'mososi bizi nizave.

¹⁶ Ido' O'moso'mo lulo lemaa' neine' nene ningo gele ele'vole' o none.

Lulo lemo nasahili' oga' monovo nene O'moso'mi emeni dameni gihile neine' nenako ve ma ingine lu'ine ve ma ngimi'mi vi minivi' divi' i'mi vilizani' nene ingine O'mosola bizi nizavo O'moso nesi engi' lu'ningu' minevo' dovo' ogo mineleseive.

¹⁷ Ido' Izesu' mene misubouko minevo' dovo' idi'mine ogo lazasi a'mine'mine ogo minevo' dovo' ogo nounako nemu' gamene nabau' O'moso'mo lihime ngemeline' gamenela nene lamine' minelone lo gele olobo' ogo none' ne'mo nene lute imune' nene apa nite' amo laminetokovo' eme gili' lolosune.

¹⁸ Lute ve ma emo ma a'mine vemu' golise gelamolosune. Lute emo gili' lune' ne'mo golise nene ehuso' oga' neive. Nemu' nene evene' O'mosomu' golise gilave ingine lihimete lemelihe li ezemu' golise gilani' ne'mo lu'ine imani' nene imi gili' lisa'mave.

¹⁹ Laza nene O'moso'mo gana' lulo limine' nenako nemu' O'mososi evenekisi lute ngemaa' noune.

²⁰ Ve malite ve mamu' mulu'ningu' goloso ogavo lukehe ngibili minaa' niigi lute nene

O'moso emaa' nounge lilizani' soza lilisave. Ve ma ingine ningi nizave ma lu'ine ngimamilizani' nene ningamave O'moso nesi mo lu'ine imamilisave. Nemu' lute O'moso emaa' nounge lilizani' nene soza lilisave.

²¹ Ido' Izesu' lo huko lo-lidine' gamazi ma ti' lo gelaa' nounge: Lute nene O'moso emo ma evenekisi ngemelone' o neive.

5

O'mosomu' Gilive Nene Misubou' Monovo Mehene nGemaa' Neive Lo Gizine' Gamazi

¹ Ve malite Izesu'nimu' nene aza do lu' ize-live lo O'moso'mo imiselelesa live neive li gili ele'vole' ilizani' nene O'mosolati' soto' igi izipahala zuho lili' igi nizave. Ido' ve ma ingine lu'ine me'nibine imi ma izipahala zuhosi ngimilisave.

² Ido' lute O'moso'mi izipahala zuho ngemaa' noube ngemamaa' noube. Lute O'moso emo lo huko line' gamazi gele do mino ma nene mo lamineto' lute ngemaa' nounge lo ningo gelelesune.

³ Lute O'moso emali'mi monovo ti' ogo neive: Lo huko line' gamazi gele dalone' nene mo lamineto' lute emaa' olosune. Ido' O'moso'mo lo huko line' gamazi nene geni'vesi nominako ngelo livizamoloseive.

⁴ O'mosolati' soto' unive laza nene O'moso gelekele' i-damani' misubou' aleveti monovo nene damo a'mine monovo nene amuzo molo do leme'mo ogo minunako O'moso'mo lo huko line' gamazi nene livizesa'mive. Ido' a'mine misubou' minine' monovo nene gele damo amuzo

molo'mo ogo minaa' nounge' nene naniteli'mo ve.
Izesu'nimu' gele ele'vole' ogo none' ne'mo ve.

⁵ Ido' zamote a'mine misubouko minine'
monovo di limi'mi igi amuzo mili minilizave.
Inginge Izesu'nimu' aza lamine' O'moso'mi gipele
neive li gili ele'vole' i nizavetevo' ne'mine ilisave.

*O'moso Aza Gipele'mi Gamazi Hize Ele' O-dine'
Gamazi*

⁶ A'mine ve Izesu' Kilisito' aza nene nososi
vanisesi soto' ine' ve. Nosovo' nomive. Soto' ine'
nene mono' noso holanikisi vanise lepo hilinekisi
ne neive. Ido' Sikalahu' ne'mo aza a'mine gamazi
nene hize ele' o-daa' neive. Sikalahu' aza gamazi
gihile'mi meleho neinako a'mine gamazi laa'
neivo gihile iza' neive.

⁷⁻⁸ Nemu' nene Sikalahu' ne'mo ido' mono'
noso holani' ne'mo ido' vanise lepo hiline' ne'mo
Izesu' monovo hize ele' i-di gono daa' nave.
Sikalahu' ido' noso holani' ido' vanise've ingine
setohamo nete gamazi lani' nene hamo' gamazi
neive.

⁹ Haza evene' nete gamazi ma hizi ele' ikevo
ma nene laza a'mine gamazi mo lamineto' neive
lo gelaa' nounge. Ne neiha O'moso'mo gamazi
liline' nene haza eveneliti gamazi ivile' ogo gi-
hile lamine' izeleseive. Nemu' nene O'moso'mo
gipele hize ele' o-do line' gamazi neine' nene gele
ele'vole' olosune.

¹⁰ Inginge O'moso'mi gipelemu' gili ele'vole'
iga' nave nene lu'inedunu' gilikevo ele'vole'
oga' neive. Ido' ingine O'moso'mo line' gamazi
gili ele'vole' ami nizave nete O'moso'mo gipele
hize ele' o-do line' gamazi nene gilikevo gihile

izesa'minako nemu' O'mosomu' sozalo' ve ve
lani' gelaa' neive.

¹¹ Ido' gipele hize ele' o-do line' gamazi nene
ti' lo neive: O'moso'mo minevo' minevo' oga'
lemeni dameni nene mo leme neive. Ido' a'mine
minevo' minevo' minaali'mi meleho nene ei'
gipele ne neive.

¹² Nemu' nene ingine O'moso'mi gipele di
gili' li nizani' nete nene minevo' minevo' oga'
ngemeni dameni nesi di nizave. Ido' ingine
O'moso'mi gipele di gili' li di minamave nete
minevo' minevo' oga' ngemeni dameni nesi mo
damave.

*Minevo' Minevo' Lemeni Damenisi
Minaakumu' Gizine' Gamazi*

¹³ O'moso'mi gipelemu' gili ele'vole' i nizave
lingine minevo' minevo' lengemeni dameni nene
mo do none li gili ele'vole' igi gililizave lo mene
gamazi nene nogize-lingimuve.

¹⁴ Laza ti' lo O'moso'mi velelo' gele olobo' o
none: O'mosola inite' mamu' voku' lunivo ei'
gele neido' vo daline' nene gele lemeleseive.

¹⁵ Ido' ne'mine mana'mine initekumu' voku'
lunivo gele lemeleseive lo gele ele'vole' o none'
nenako inite' mamu' voku' lo-delone' nene
lemavo lite' lo daa' nounge lo gele none.

¹⁶ Ve mali'mo eze zuho ma goloso nite'
nodavo ningivo a'mine ne'mo mudise helaa'
akau' vilido' nomivo ma nene a'mine vemu'
O'mosola lilive. Lavo O'moso'mo minevo'
minevo' emeni damenisi mine do dizo mine-
line' akalo' ele'mize molaloseive. Mudise hi-
laa' akau' vilizado' nomine' goloso nite' dave-
mukovo' noluve. Goloso nite' ma neine' nene

a'mine dalizani' nene mudise hilaa' akau' vilizado' o neive. Ne'mine inite' davemu' O'mosola lilizave lo lamuve.

¹⁷ Goloso nite' muki' nene lihime daa' nitekovo' neive. Neine'za goloso nite' ma dalone' nene vo mudise helaa' akau' volonido' nomive.

¹⁸ Laza ti' lo gelaa' nounge: O'mosolati' soto' unidite nene goloso nite' do minamolosune. O'moso'mi gipele ne'mo gizebo o-ledavo goloso'mi meleho aza gelelehe' o-ledo do goloso o-ledamoloseive.

¹⁹ Laza nene O'mosolati' soto' ogo none lo gele none. Ido' me misubou' ve O'moso gelekele' idamani' muki' nete goloso melehida vi gi'mizi gelekele' i-di nizani' nesi gele none.

²⁰ Ido' ti' lo gele none: O'moso'mi gipele aza misubouko lemo ogave. Ogo gate do ngolo' lolidine' nenako O'moso gihile nene ningo gelaa' nounge'. Ee, O'moso gihile nesi bizo none. Gipele Izesu' Kilisitokisi bizo none. Me ve nene O'moso gihile ido' minevo' minevo' ogo minaali'mi meleho neive.

²¹ Izipaha'ne zuho mate, lingine avazaha o'moso nite' O'moso gihile minamani' nene gelekele' i-ngidikelizaze. Monovotido' gizebo lamine' igi minilo.

Moda ve.

MONO' GODOLO GOSOHO'
The New Testament in the Dano (Upper Asaro)
language of Papua New Guinea
Nupela Testamen long tokples Dano (Upper Asaro)
long Niugini

copyright © 1989 Wycliffe Bible Translators, Inc.

Language: Dano

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-06-24

PDF generated using Haiola and XeLaTeX on 28 Dec 2024 from source files dated 31 Aug 2023

76c78bc1-63e6-5f61-a363-169051cfe72e